

四庫全書

集部

欽定四庫全書

唐詩品彙卷二十八

明 高棟 編

七言古詩四

大家

杜甫

貧交行

翻手作雲覆手雨紛紛輕薄何須數君不見管鮑貧時



交此道今人棄如土

劉須溪云只從俗諺畧證古意

折檻行

嗚呼房魏不復見秦王學士時難羨青衿胄子困泥塗
白馬將軍若雷電千載少似朱雲人至今折檻空嶙峋
婁公不語宋公語尚憶先皇容直臣

大麥行

大麥乾枯小麥黃婦女行泣夫走藏東至集壁西梁洋
問誰腰鎌胡與羌豈無蜀兵三千人部領辛苦江山長

安得如鳥有羽翅託身白雲還故鄉

苦戰行

苦戰身死馬將軍自云伏波之子孫干戈未定失壯士
使我歎恨傷精魂去年江南討狂賊臨江把臂難再得
別時孤雲今不飛時獨看雲淚橫臆

悲陳濤

此詩為房琯而作也琯與
祿山戰于陳濤斜敗績

孟冬十郡良家子血作陳濤澤中水野曠天清無戰聲
四萬義軍同日死羣胡歸來血洗箭仍唱胡歌飲都市

都人回首向北啼日夜更望官軍至

朱鳳行

此詩為衡州刺史楊濟作也時濟稱連帥之職以討臧玠之亂

君不見瀟湘之山衡山高山巔朱鳳聲嗷嗷側身長顧
求其曹翅垂口噤心甚勞下愍白鳥在羅網黃雀最少
雛難逃願分竹實及螻蟻盡使鳴梟相怒號

越王樓歌

綿州州府何磊落頭慶年中越王作孤城西北起高樓
碧瓦朱甍照城郭樓下長江百丈清山頭落日半輪明

君王舊跡今人賞轉見千秋萬古情

劉云不深不淺

大覺高僧蘭若

巫山不見廬山遠松林蘭若秋風晚
一老猶鳴日暮鐘
諸僧尚乞齋時飯香爐峰色隱晴湖
種杏仙家近白榆
飛錫去年啼邑子獻花何日許門徒

秋風

秋風淅淅吹我衣東流之外西日微
天晴小城擣練急
石古細路行人稀不知明月為誰好
早晚孤帆他夜歸

會將白髮倚庭樹故園池臺今是非

趙次公曰此寫眼前之景宛轉含蓄

道不盡淒感之意 樂府矯矯長句不必親切為已

劉云如竹枝

夜聞簾簾

夜聞簾簾滄江上衰年側耳情所嚮鄰舟一聽多感傷

塞曲三更歛悲壯積雪飛霜此夜寒孤燈急管復風湍

君知天地干戈滿不見江湖行路難

劉云君知干戈如此則不復恨行路

難矣實歷喟然

乾元中寓居同谷縣作歌七首

李薦師友記開太白遠別離蜀

道難與子美寓居同谷七歌風
騷之極致不在屈原之下也

有客有客字子美白頭亂髮垂過耳歲拾橡栗隨俎公
天寒日暮山谷裏中原無書歸不得手足凍皴皮肉死
嗚呼一歌兮歌已哀悲風為我從天來

長鏡長鏡白木柄

劉云一歌喚子美二
歌喚長鏡宜不奇崛

我生托子以為

命黃精無苗山雪盛短衣數挽不掩脛此時與子空歸
來男呻女吟四壁靜嗚呼二歌兮歌始放閭里為我色

惆悵

劉云非必人人為
我惆悵而有其色

有弟有弟在遠方三人各瘦何人強生別展轉不相見
胡塵暗天道路長東飛鴛鴦後鵲安得送我置汝傍
嗚呼三歌兮歌三發汝歸何處收兄骨

有妹有妹在鍾離良人早沒諸孤癡長淮浪高蛟龍怒
十年不見來何時扁舟欲往箭滿眼杳杳南國多旌旗
嗚呼四歌兮歌四奏林猿為我啼清晝

四山多風谿水急寒雨颯颯枯樹濕

劉云是旦景

黃蒿古城

雲不開白狐跳梁黃狐立我生胡為在窮谷中夜起坐

萬感集嗚呼五歌兮歌正長魂招不來歸故鄉

劉云何其魂招

不來即歸故鄉也

南有龍兮在山湫古木龍從枝相樛木葉黃落龍正蟄

蝮蛇東來水上遊我行怪此安敢出拔劍欲斬且復休

嗚呼六歌兮歌思遲谿壑為我迴春姿

劉云獨此歌迴春姿者愿車駕

反正之辭也心所同然千載如對

男兒生不成名身已老三年饑走荒山道長安卿相多

少年富貴應須致身早山中儒生舊相識但話宿昔傷

懷抱嗚呼七歌兮悄終曲仰視皇天白日速

劉云聲氣俱盡孫

季昭示兒編云歐陽公傷五季之亂作五代史序論故盡以嗚呼冠其首杜子美傷唐室之亂作詩史於歌行間以嗚呼結其末同谷歌冬狩行折檻行白馬詩等篇是也前此詩人所稀有者公獨用之其傷今思古之意歟

短歌行贈王郎司直

王郎酒酣拔劍斫地歌莫哀我能拔爾抑塞磊落之奇
才豫樟翻風白日動鯨魚跋浪滄溟開且脫劍佩休徘徊
西得諸侯棹錦水

劉云西得諸侯以下謂王司直知我我復捨此何之

欲向何

門跼珠履仲宣樓頭春色深青眼高歌望吾子眼中之

人吾老矣

劉云豪氣激人
堂堂復堂堂

玄都壇寄元逸人

故人昔隱東蒙峰已佩含景蒼精龍故人今居子午谷
獨在陰崖結茆屋屋前太古玄都壇青石漠漠常風寒
子規夜啼山竹裂王母晝下雲旗翻知君此計成長往
芝草琅玕日應長鐵鏤高垂不可攀致身福地何蕭爽

莫相疑行

男兒生無所成頭皓白牙齒欲落真可惜憶獻三賦蓬
萊宮自怪一日聲輝赫集賢學士如堵牆觀我落筆中
書堂往時文彩動人主此日飢寒趨路傍晚將末契托
年少當面輸心背面笑寄謝悠悠世上兒不爭好惡莫
相疑

劉云寫得徹
至懷抱如洗

醉歌行贈公安顏少府請顧公題壁

神仙中人不易得顏氏之子才孤標天馬長鳴待駕馭
秋鷹整翮當雲霄君不見東吳顧文學君不見西漢杜

陵老

劉云面前人着兩不見唐突可人

詩家筆勢君不嫌詞翰升堂為

君掃是日霜風凍七澤烏蠻落照銜赤壁酒酣耳熱忘
頭白感君意氣無所惜一為歌行歌主客

戲題王宰畫山水圖歌

十日畫一水五日畫一石能事不受相促迫王宰始肯
留真跡壯哉崑崙方壺圖挂君高堂之素壁巴陵洞庭
日本東赤岸水與銀河通中有雲氣隨飛龍舟人漁子
入浦淑山木盡亞洪濤風尤工遠勢古莫比咫尺應須

論萬里馬得并州快剪刀剪取吳淞半江水

高都護驄馬行

安西都護胡青驄聲價歛然來向東此馬臨陣久無敵
與人一心成大功

劉云亦是精氣

功成惠養隨所致飄飄遠自

流沙至雄姿未受伏櫪恩猛氣猶思戰場利

劉云此氣骨不可少

腕促蹄高如踣鐵交河幾蹴層冰裂五花散作雲滿身

萬里方看汗流血長安壯兒不敢騎走過掣電傾城知

青絲絡頭為君老何由却出橫門道

劉云只如此語絕是

負薪行

夔州處女髮半華
四五十無夫家
更遭喪亂嫁不售
一生抱恨堪咨嗟
土風坐男使女立
應當門戶女出入
十猶八九負薪歸
賣薪得錢應供給
至老雙鬟只垂頸
野花山葉銀釵並
勛力登危集市門
死生射利兼鹽井
面粧首飾雜啼痕
地徧衣寒困石根
若道巫山女麤醜
何得比有昭君村

最能行

峽中丈夫絕輕死少在公門多在水富豪有錢駕大舸
貧窮取給行艤子小兒學問止論語大兒結束隨商旅
歌帆側拖入波濤檣旋捎瀆無險阻朝發白帝暮江陵
頃來目擊信有徵瞿塘漫天虎鬚怒歸州長年行最能
此鄉之人氣量窄誤競南風踈北客若道土無英雄才
何得山有屈原宅

寄栢學士林居

自胡之反持干戈天下學士亦奔波歎彼幽棲載典籍

蕭然暴露依山阿青山萬里靜散地白雨一洗空垂蘿
亂代飄零予到此古人成敗子如何荆揚春冬異風土
巫峽日夜多風雨赤葉楓林百舌鳴黃泥野岸天雞舞
盜賊縱橫甚密邇形神寂寞甘辛苦幾時高議排金門
各使蒼生有環堵

杜鵑行

君不見昔日蜀天子化為杜鵑似老鳥寄巢生子不自
啄羣鳥至今為哺雛雖同君臣有舊禮骨肉滿眼身羈

孤業工竄伏深樹裏四月五月偏號呼其聲哀痛口流血所訴何事常區區爾豈摧殘始發憤羞帶羽翮傷形愚蒼天變化誰料得萬事反覆何所無萬事反覆何所無豈憶當殿羣臣趨

柟樹為風雨所拔歎

倚江柟樹草堂前故老相傳二百年誅茅卜居總為此五月髣髴聞寒蟬東南飄風動地至江翻石走流雲氣幹排雷雨猶力爭根斷泉源豈天意蒼波老樹性所愛

浦上童童一青蓋
野客頻留懼雪霜
行人不過聽竿籟
虎倒龍顛委榛棘
淚痕血點垂胸臆
我有新詩何處吟
草堂自此無顏色

戲韋僊為雙松圖歌

天下幾人畫古松
畢宏已老韋僊少
絕筆長松起纖末
滿堂動色嗟神妙
兩株慘裂苔蘚皮
屈鐵交錯迴高枝
白摧朽骨龍虎死
黑入太陰雷雨垂
松根胡僧憩寂寞
龐眉皓首無住著
偏袒右肩露雙腳
葉裏公子僧前落

韋侯韋侯數相見我有一疋好東絹重之不減錦繡段
已令拂拭光凌亂請公放筆為直幹

送孔巢父謝病歸遊江東兼呈李白

巢父掉頭不肯住東將入海隨煙霧詩卷長留天地間
釣竿欲拂珊瑚樹深山大澤龍蛇遠春寒野陰風景暮

劉云不必有所從來不必有所指玄又
玄衆妙門 七字浩然以其將隱也 蓬萊織女迴雲

車指點虛無引歸路自是君身有仙骨世人那得知其

故惜君只欲苦死留

劉云兩君
見齊主

富貴何如草頭露蔡侯

靜者意有餘清夜置酒臨前除罷琴惆悵月照席幾歲

寄我空中書南尋禹穴見李白道甫問訊今何如

劉云其跌

蕩創體類自得
意故成一家言

冬末以事之東都湖城遇孟雲卿復歸劉顥宅

宿宴飲散因為醉歌

疾風吹塵暗河縣行子隔年不相見湖城城北一開眼
駐馬偶識雲卿面向非劉顥為地主懶迴鞭轡成高宴
劉侯歡我携客來置酒張燈促華饌且將款曲終今夕

休語艱難尚酣戰照室紅爐促曙光螢牕素月垂文練
天開地裂長安陌寒盡春生洛陽殿豈知驅車復同軌
可惜刻漏隨更箭人生會合不可常庭樹鷄鳴淚如綫

陪王侍御同登東山最高頂宴姚通泉晚攜酒
泛江

姚公美政誰與儔不減昔時陳太丘邑中上客有柱史
多暇日陪驄馬遊東山高頂羅珍羞下顧城郭消我憂
清江白日落欲盡復攜美人登綵舟笛聲憤怨哀中流

妙舞逶迤夜未休
燈前往往大魚出
聽曲低昂如有求
三更風起寒浪湧
取樂喧呼覺船重
滿空星河光破碎
四座賓客色不動
請公臨深莫相違
迴船罷酒上馬歸
人生歡會豈有極
無使霜露霑人衣

錦樹行

題自錦樹
使人刮目

今日苦短昨日休
歲云暮矣增離憂
霜凋碧樹作錦樹
萬壑東逝無停留
荒戍之城石色古
東郭老人住青丘
飛書白帝營斗粟
琴瑟几杖柴門幽
青草萋萋盡枯死

天驥跛足隨羗牛自古聖賢多薄命姦雄惡少封公侯
故國三年一消息終南渭水寒悠悠五陵豪貴反顛倒
鄉里小兒狐白裘生男墮地要膂力生女富貴傾邦國
莫愁父母少黃金天下風塵兒亦得

瘦馬行

東郊瘦馬使我傷骨骼硤兀如堵牆絆之欲動轉歎側
此豈有意仍騰驤細看六印帶官字衆道三軍遺路傍
皮乾剝落雜泥滓毛若蕭條連雪霜去歲奔波逐餘寇

驂騑不慣不得將士卒多騎內廐馬惆悵恐是病乘黃
當時歷塊悞一蹶委棄非汝能周防見人慘澹若哀訴
失主錯莫無晶光天寒遠放雁為伴日暮不收烏啄瘡
誰家且養願終惠更試明年春草長

劉云展轉沈着忠厚惻怛感動千古

哀江頭

少陵野老吞聲哭春日潛行曲江曲江頭宮殿鎖千門
細柳新蒲為誰綠憶昔霓旌下南苑苑中萬物生顏色
昭陽殿裏第一人同輦隨君侍君側輦前才人帶弓箭

白馬嚼齧黃金勒翻身向天仰射雲一箭正墜雙飛翼
明眸皓齒今何在血污遊魂歸不得清渭東流劍閣深
去住彼此無消息人生有情淚沾臆江水江花豈終極
黃昏胡騎塵滿城欲往城南忘城北

蘇子由云哀江頭
篇詞氣如百金戰

馬注坡驀澗如履平
地得詩人之遺法

樂遊園歌

公自注云晦日賀蘭楊長史筵醉中
作按西京雜記樂遊園漢宣帝所

立唐長安中太平公主於原上置庭遊賞其地
四望寬敞每上巳重陽士夫於此祓禊登高車

馬填塞朝士詞人賦

詩翌日傳於京師

樂遊古園萃森爽煙綿碧草萋萋長公子華筵勢最高
秦川對酒平如掌長生木瓢示真率更調鞍馬狂歡賞
青春波浪芙蓉園白日雷霆夾城仗閭闔晴開眊蕩蕩
曲江翠幕排銀榜拂水低垂舞袖翻綠雲清切歌聲上

劉云婉約有態

却憶年年人醉時只今未醉已先悲

劉云語違自別數

莖白髮那拋得百罰深盃亦不辭聖朝亦知賤士醜一

物自荷皇天慈此身飲罷無歸處獨立蒼茫自咏詩

劉云

每誦此結不自堪又云吾常墮淚於此

寄韓諫議注

今我不樂思岳陽身欲奮飛病在牀美人娟娟隔秋水
濯足洞庭望八荒鴻飛冥冥日月白青楓葉赤天雨霜
玉京羣帝集北斗或騎麒麟翳鳳凰芙蓉旌旗煙霧落
影動倒景搖瀟湘星宮之君醉瓊漿羽人稀少不在傍
似聞昨者赤松子恐是漢代韓張良昔隨劉氏定長安惟
幄未改神慘傷國家成敗吾豈敢色難腥腐食楓香周
南留滯古莫惜南極老人應壽昌美人胡為隔秋水焉

得置之貢玉堂

劉云此篇多渺茫恍惚
幾失韓注畢竟不合

飲中八仙歌

知章騎馬似乘船
眼花落井水底眠
汝陽三斗始朝天
道逢麴車口流涎
恨不移封向酒泉
左相日興費萬錢

飲如長鯨吸百川
銜杯樂聖稱避賢

或作世
賢無文

宗之瀟灑

美少年舉觴白眼望青天
皎如玉樹臨風前
蘇晉長齋

繡佛前醉中往往愛逃禪
李白一斗詩百篇
長安市上

酒家眠
天子呼來不上船
自稱臣是酒中仙
張旭三盃

草聖傳脫帽露頂王公前揮毫落紙如雲煙焦遂五斗

方卓然高談雄辯驚四筵

蔡條西清詩話云此歌重疊用韵古無其體嘗質之叔父

元度云此歌分八篇人人各畢雖重押韵無害亦三百篇分章之意也劉云不倫不理各極其平生極其醉趣古無此體無此妙謂為八仙甚辨

驄馬行

公自注云太常良卿勅賜馬也李鄧公愛而有之命甫製詩

鄧公馬癖人共知初得花驄大宛種夙昔傳聞思一見
牽來左右神皆竦雄姿逸態何齒萃顧影嬌嘶自矜寵
隅目青瑩夾鏡懸肉駿硯礪連錢動朝來少試華軒下

未覺千金滿高價赤汗微生白雪毛銀鞍却覆香羅帕

劉云無繁要有風味

卿家舊物公能取天廐真龍此其亞晝洗須

騰涇渭深朝趨可刷幽并夜吾聞良驥老始成此馬數
年人更驚豈有四蹄疾於鳥不與八駿俱先鳴時俗造
次那得致雲霧晦冥方降精近聞下詔宣都邑肯使麒
麟地上行

醉歌行

公自注從姪勤落第歸作此以別之

陸機二十作文賦汝更少年能綴文總角草書又神速

欽定四庫全書

卷二十八

世上兒子徒紛紛
驂作駒已汗血
驚鳥舉翮連青雲
詞源倒流三峽水
筆陣獨掃千人軍
只今年纔十六七
射策君門期第一
舊穿楊葉真自知
暫蹶霜蹄未為失
偶然擢秀非難取
會是排風有毛質
汝身已見唾成珠
汝伯何由髮如漆
春光淡沲秦東亭
渚蒲芽白水荇青
風吹客衣日杲杲
樹攪離思花冥冥
酒盡沙頭雙玉瓶
衆賓已醉我獨醒
乃知貧賤別更苦
吞聲踣躅涕淚零

劉云人有此情寫
得不濃至而止

古栢行

孔明廟前有老栢柯如青銅根如石

范元寶云此形似之語

霜皮

溜雨四十圍黛色參天二千尺君臣已與時際會樹木

猶為人愛惜雲來氣接巫峽長月出寒通雪山白

范元寶云

此激昂之語

憶昨路繞錦亭東先主武侯同閔宮崔嵬枝幹

郊原古窈窕丹青戶牖空落落盤踞雖得地冥冥孤高

多烈風扶持自是神明力正直元因造化功大厦如傾

要梁棟萬牛回首丘山重不露文章世已驚未辭剪伐

誰能送苦心豈免容螻蟻香葉終經宿鸞鳳志士幽人
莫怨嗟古來材大難為用

憶昔行

憶昔北尋小有洞洪河怒濤過輕舸辛勤不見華蓋君
艮岑清輝慘么麼千崖無人萬壑靜三步回頭五步坐
秋山眼冷魂未歸仙賞心違淚交墮

劉云亦悲
款數四

弟子誰

休白茆室盧老獨啓青銅鎖巾拂香餘搗藥塵階除灰
死燒丹火玄圃滄洲莽空濶金節羽衣飄婀娜落日初

霞閃餘映倏忽東西無不可

劉云恍惚語

松風澗水聲合時

青兕黃熊啼向我

劉云岑寂語四句極俯仰形容之妙

徒然咨嗟撫遺跡

至今夢想仍猶在秘節隱文須內教晚歲何功使願果
更討衡陽董鍊師南遊早鼓瀟湘柂

冬狩行

公自注時梓州刺史章彝兼侍御史留後東川時章彝大閱東川公以此詩諷

其多殺仍勉其攘夷狄安王室

君不見東川節度兵馬雄校獵亦似觀成功夜發猛士
三千人清晨合圍步驟同禽獸已斃十七八殺聲落日

迴蒼穹幙前生致九青兕駝嵒崖垂玄熊東西南北
百里間髣髴蹴踏寒山空有鳥名鸛鵒力不能高飛逐
走蓬肉味不足登鼎俎胡為見羈虞羅中春蒐冬狩侯
得同使君五馬一馬驄況今攝行大將權號令頗有前
賢風飄然時危一老翁十年厭見旌旗紅喜君士卒甚
整肅為我回轡擒西戎草中狐兔盡何益天子不在咸
陽宮朝廷雖無幽王禍得不哀痛塵再蒙鳴呼得不哀
痛塵再蒙

哀王孫

毛深父曰時安祿山驚潼關上夜半出延秋門諸王公主皆不及從多為賊所

磨此詩記而哀之

長安城頭頭白烏夜飛延秋門上呼又向人家啄大屋

屋底連官走避胡

劉云起如童謠省叙事處

金鞭斷折九馬死骨肉

不待同馳驅腰下寶玦青珊瑚可憐王孫泣路隅問之

不肯道姓名但道困苦乞為奴已經百日竄荆棘身上

無有完肌膚高帝子孫盡隆準龍種自與常人殊豺狼

在邑龍在野王孫善保千金軀不敢長語臨交衢且為

王孫立斯須昨夜春風吹血腥東來橐駝滿舊都朔方
健兒好身手昔何勇銳今何愚竊聞太子已傳位聖德
北服南單于花門勞面請雪耻慎勿出口他人狙哀哉

王孫慎勿踈五陵佳氣無時無

劉云忠臣之盡心倉卒之隱語備盡情態

觀公孫大娘弟子舞劍器行

并序

大厯二年十月十九日夔州別駕元特宅見臨穎
李十二娘舞劍器壯其蔚跂問其所師曰余公孫
大娘弟子也開元三載余尚童稚記於郾城觀公

孫氏舞劍器渾脫瀏漓頓挫獨出冠時自高頭宜
春梨園二妓坊內人洎外供奉曉是舞者聖文神
武皇帝初公孫一人而已玉貌繡衣況余白首今
茲弟子亦匪盛顏既辨其由來知波瀾莫二撫事
慷慨聊為劍器行昔者吳人張旭善草書書帖數
常於鄴縣見公孫大娘舞西河劍器自此草書長
進豪蕩感激即公孫可知矣

昔有佳人公孫氏一舞劍器動四方觀者如山色沮喪

天地為之久低昂燿如羿射九日落矯如羣帝駢龍翔

來如雷霆收震怒罷如江海凝清光

劉云名狀得意

絳唇朱袖

兩寂寞晚有弟子傳芬芳臨穎美人在白帝妙舞此曲

神揚揚與余問答既有以感時撫事增惋傷先帝侍女

八千人公孫劍器初第一五十年間似反掌風塵瀕洞

昏王室梨園弟子散如煙女樂餘姿映寒日金粟堆南

木已拱瞿塘石城草蕭瑟玳筵急管曲復終樂極哀來

月東出老夫不知其所往足蘭荒山轉愁疾

劉云濃至慘黯如野

笛中斷聞者
自不堪也

蘇端薛復筵簡薛華醉歌

文章有神交有道端復得之名譽早

劉云第能此起不患辭窮

愛客

滿堂盡豪傑開筵上日思芳草安得健步移遠梅亂插
繁花向晴昊千里猶殘舊冰雪百壺且試開懷抱垂老
惡聞戰鼓悲急觴為緩憂心擣少年努力縱談笑看我
形容已枯槁座中薛華善醉歌歌辭自作風格老近來
海內為長句汝與山東李白好

劉云此老歌行之妙有不自知其所至者何

劉沈謝力未工才魚鮑照愁絕倒諸生頗盡新知樂萬
事終傷不自保

劉云可哀

氣酣日落西風來願吹野水添金

杯如澠之酒常快意亦知窮愁安在哉忽憶雨時秋井

塌古人白骨生青苔如何不飲令心哀

劉云豪俠

漢陂行

岑參兄弟皆好奇攜我遠來遊漢陂天地黯慘忽異色波
濤萬頃堆琉璃琉璃汗漫汎舟入事殊興極憂思集鼉作
鯨吞不復知惡風大浪何嗟及主人錦帆相為開舟子

喜甚無氛埃。鳬鷺散亂棹。謳發絲管啁。啾空翠來沈竿。

續蔓深莫測。菱葉荷花淨。如拭宛在中。流渤澥清下歸。

無極終南黑。半陂已南純。浸山影動裊。窕冲融間舡舩。

暝曼雲際寺。水面月出藍田關。

劉云寫景入微煙波遠近變態具足

此時

驪龍亦吐珠。馮夷擊鼓羣龍趨。湘妃漢女出歌舞。金支

翠旗光有無。咫尺但愁雷雨至。蒼茫不曉神靈意。

劉云慘愴

之容窈眇之思 尋常賦樂事則所經歷駭愕者置少不復道吾常遊西湖遇風雨誦此語如同舟同時

壯幾時奈老何。向來哀樂何其多。

奉先劉少府新畫山水障歌

堂上不合生楓樹怪底江山起煙霧聞君掃却赤縣圖
乘興遣畫滄洲趣畫師亦無數好手不可遇對此融心
神知君重毫素豈但祁岳與鄭虔筆跡遠過楊契丹得
非玄圃裂無乃瀟湘翻悄然坐我天姥下耳邊已似聞
清猿反思前夜風雨急乃是滿城鬼神入元氣淋漓障
猶濕真宰上訴天應泣野亭春還雜花遠漁翁暝踏孤
舟立滄浪水深青溟瀾歌岸側島秋毫末不見湘妃鼓

瑟時至今斑竹臨江活劉侯天機精愛畫入骨髓自有
兩兒郎揮灑亦莫比大兒聰明到能添老樹巔崖裏小
兒心孔開貌得山僧及童子若耶谿雲門寺吾獨胡為
在泥滓青鞋布襪從此始

劉云玄淡活脫自在 范德機云歌行之奇清景絕者

又云古今題畫之律度也

韋諷錄事宅觀曹將軍畫馬圖引

國初以來畫鞍馬神妙獨數江都王

劉云起得跡鹵正合古意

將軍

得名三十載人間又見真乘黃會貌先帝照夜白龍池

十日飛霹靂內府殷紅瑪瑙盤婕妤傳詔才人索盤賜
將軍拜舞歸輕紈細綺相追飛貴戚權門得筆跡始覺
屏障生光輝昔日太宗拳毛騶近時郭家獅子花今之
新圖有二馬復令識者久歎嗟此皆騎戰一敵萬縞素
漠漠開風沙其餘七疋亦殊絕迥若寒空動煙雪霜蹄
蹴踏長楸間馬官廐養森成列可憐九馬爭神駿顧視
清高氣深穩借問苦心愛者誰後有韋諷前支遁憶昔
巡幸新豐宮翠華拂天來向東騰驤磊落三萬疋皆與

此圖筋骨同自從獻寶朝河宗無復射蛟江水中

劉云四句

沈着雅麗政在事
事記物事在言外

君不見金粟堆前松柏裏龍媒去盡

鳥呼風

劉云長篇意
外淪痛險絕

丹青引贈曹將軍霸

將軍魏武之子孫於今為庶為清門

劉云起語激昂
慷慨少有及此

英

雄割據雖已矣文采風流今尚存

劉云按
得又暢

學書初學衛

夫人但恨無過王右軍丹青不知老將至富貴於我如

浮雲

劉云突兀四語能事志意畢竟往復浩蕩只在裏
許又云自是筆意至此非思致所及

謝無勉云

此自然不做底語
到及至處者也

開元之中常引見承恩數上南薰殿

凌煙功臣少顏色將軍下筆開生面良相頭上進賢冠

猛將腰間大羽箭褒公鄂公毛髮動英姿颯爽來酣戰

先帝天馬玉花驄畫工如山貌不同是日牽來赤墀下

迴立閭闔生長風

劉云迴立
意從容

詔謂將軍拂絹素意匠慘

淡經營中斯須九重真龍出一洗萬古凡馬空

洪容齋
五筆云

不妨獨
步也

玉花却在御榻上榻上庭前屹相向至尊含笑

催賜金圍人太僕皆惆悵弟子韓幹早入室亦能畫馬

窮殊相幹惟畫肉不畫骨忍使驂騑氣凋喪

劉云將軍名言

善畫蓋有神必逢佳士亦寫真

劉云謂未遇佳士故

即今漂泊干

戈際屢貌尋常行路人途窮反遭俗眼白世上未有如

公貧但看古來盛名下終日坎壈纏其身

劉云首尾悲壯動盪皆名

言

兵車行

師古云此詩為唐玄宗用兵吐蕃而作託武帝以風刺也

車麟麟馬蕭蕭行人弓箭各在腰爺娘妻子走相送塵

埃不見咸陽橋牽衣頓足攔道哭哭聲直上千雲霄道

傍過者問行人行人但云點行頻或從十五北防河便
至四十西營田去時里正與裹頭歸來頭白還戍邊庭
流血成海水武皇開邊意未已君不見漢家山東二百
州千村萬落生荆杞縱有健婦把鋤犁禾生隴畝無東
西況復秦兵耐苦戰被驅不異犬與雞長者雖有問役
夫敢申恨且如今年冬未休關西卒縣官急索租租稅
從何出信知生男惡反是生女好生女猶得嫁比鄰生
男埋沒隨百草君不見青海頭古來白骨無人收新鬼

煩冤舊鬼哭天陰雨濕聲啾啾

蔡寬夫詩話云齊梁以來文喜為樂府沿襲既

久往往失其命題之意雖李白亦不免此唯少陵兵車行等篇皆因事自出已意立題畧無蹈襲前人陳跡真

所謂豪傑也

洗兵馬行

公自注云
收京後作

中興諸將收山東捷書夜報清晝同河廣傳聞一筆過

胡危命在破竹中祗殘鄴城不日得獨任朔方無限功

京師皆騎汗血馬回紇餒肉蒲萄宮已喜皇威清海岱

常思仙仗過崆峒三年笛裏關山月萬國兵前草木風

劉云悲壯少及

成王功大心轉小郭相謀深古來少司徒清鑒

懸明鏡尚書氣與秋天杳二三豪俊為時出整頓乾坤

濟時了東走無復憶鱸魚南飛各有安巢鳥青春復隨

冠冕入紫禁正耐煙花繞

劉云有氣象有風韻

鶴駕通宵鳳輦備

雞鳴問寢龍樓曉攀龍附鳳勢莫當天下盡化為侯王

汝等宜知蒙帝力時來不得誇身強

劉云事外句外常有餘力

關中

既留蕭丞相幕下復用張子房張公一生江海客身長

九尺鬢眉蒼微起適遇風雲會扶顛始知籌策良青袍

白馬更何有後漢今周喜再昌寸地尺天皆入貢奇祥
異瑞爭來送不知何國致白環復道諸山得銀甕隱士
休歌紫芝曲詞人解撰河清頌田家望望惜雨乾布穀
處處催春種淇上健兒歸莫懶城南思婦愁多夢安得
壯士挽天河洗淨甲兵長不用

劉云此篇對律甚嚴而
春容醞藉西清詩話

云作詩者陶冶物情體會光景必貴乎自得格有高卑
才有分限不可強力致也譬之秦武陽氣蓋全燕見秦
王則戰栗失色淮南王安雖為神仙謁帝猶輕其舉止
此豈由素習哉予以謂少陵太白當險阻艱難流離困
躓意欲卑而語未嘗不高至於羅隱貫休輩得意於偏
霸誇雕逞奇語欲高而意未嘗不卑乃知天稟自然有

不能
易也

追酬故高蜀州人日見寄

并序

開文書帖中檢所遺忘因得故高當侍適往居在
成都時高任蜀州刺史人日相憶見寄詩淚灑行
間讀終篇末自枉詩已十餘年莫記存沒又六七
年矣老病懷舊生意可知今海內忘形故人獨漢
中王瑀與昭州敬使君超先在愛而不見情見乎
辭大歷五年正月二十一日却追酬高公此作因

寄王友敬弟

自蒙蜀州人日作不意清詩久零落今晨散帙眼忽開
迸淚幽吟事如昨嗚呼壯士多慷慨合沓高名動寥廓
歎我悽悽求友篇感時鬱鬱匡君畧錦里春光空爛熳
瑤墀侍臣已冥寞瀟湘水國旁龜鼉郭杜秋天失鵬鵠
東西南北更堪論白首扁舟病獨存遙拱北辰纏寇盜
欲傾東海洗乾坤邊塞西蕃最充斥衣冠南渡多崩奔
鼓瑟至今悲帝子曳裾何處謁王門文章曹植波瀾濶

服食劉安德業尊長笛誰能亂愁思昭州詞翰與招魂

唐詩品彙卷二十八

欽定四庫全書

唐詩品彙卷二十九

明 高棟 編

七言古詩五

名家

上

高適

行路難二首

長安少年不少錢
能騎駿馬鳴金鞭
五侯相逢大道邊

美人絃管爭留連黃金如斗不敢惜片言如山莫棄捐
安知憔悴讀書者暮宿靈臺私自憐

君不見富家翁舊時貧賤誰比數一朝金多結豪貴百
事勝人健如虎子孫成行滿眼前妻能管絃妾能舞自
矜一身忽如此却笑傍人獨愁苦東陵少年安所如席
門窮巷出無車有才不肯學干謁何用年年空讀書

邯鄲少年行

邯鄲城南遊俠子自矜生長邯鄲裏干場縱博家仍富

幾處報讐身不死宅中歌笑日紛紛門外車馬如雲屯
未知肝膽向誰是令人却憶平原居殷云余所最深愛者君不見
今日交態薄黃金用盡還踈索以茲感歎辭舊遊更於
時事無所求且與少年飲美酒往來射獵西山頭

古大梁行

古城莽蒼饒荆榛驅馬荒城愁殺人魏王宮觀盡禾黍
信陵賓客隨灰塵憶昨雄都舊朝市軒車照耀歌鐘起
軍容帶甲三十萬國步連營五千里全盛須臾那可論

高臺曲池無復存遺墟但見狐狸迹古地空餘草木根
暮天搖落傷懷抱撫劍悲歌對秋草俠客猶傳朱亥名
行人尚識夷門道白壁黃金萬戶侯寶刀駿馬填山丘
年代淒涼不可問往來惟見水東流

燕歌行

開元二十六年客有從元戎出塞而還者作燕歌
行以示適感征戍之事因而和焉

漢家煙塵在東北漢將辭家破殘賊男兒本自重橫行

天子非常賜顏色
撻金伐鼓下榆關
旌旆逶迤碣石間
校尉羽書飛瀚海
單于獵火照狼山
山川蕭條極邊土
胡騎憑陵雜風雨
戰士軍前半死生
美人帳下猶歌舞
大漠窮秋塞草腓
孤城落日鬪兵稀
身當恩遇常輕敵
力盡關山未解圍
鐵衣遠戍辛勤久
玉筋應啼別離後
少婦城南欲斷腸
征人薊北空回首
邊庭飄飄那可度
絕域蒼茫無所有
殺氣三時作陣雲
寒聲一夜傳刁斗
相看白刃雪紛紛
死節從來豈顧勲
君不見沙場征戰

苦至今猶憶李將軍

殷云甚有奇句

漁父歌

曲岸深潭一山叟駐眼看釣不移手世人欲得知姓名
良久問他不開口笋皮笠子荷葉衣心無所營守釣磯
料得孤舟無定止日暮持竿何處歸

九月九日酬顏少府

簷前白日應可惜籬上黃花為誰有行子迎霜未授衣
主人得錢始沽酒蘇秦憔悴人多厭蔡澤棲遲世看醜

縱使登高只斷腸不如獨坐空搔首

送別

昨夜離心正鬱陶三更白露西風高螢飛木落何淅瀝
此時夢見西歸客曙鐘寥亮三四聲東鄰嘶馬使人驚
攬衣出戶一相送惟見歸雲縱復橫

別李景參

離心忽悵然策馬對秋天孟諸薄暮涼風起歸客相逢
度睢水昨時攜手已十年今日分途各千里歲物蕭條

滿路岐此行浩蕩令人悲家貧美爾有微祿欲往從之
何所之

送田少府貶蒼梧

沈吟對遷客惆悵西南天昔為一官未得意今向萬里
令人憐念茲斗酒成睽間停舟歎君日將晏遠樹應連
北地春行人却羨南歸雁丈夫窮達未可知看君不合
長數竒江山到處堪乘興楊柳青青那足悲

崔司錄宅宴大理李卿

多雨殊未已秋雲更沈沈洛陽故人初解印山東小吏
來相尋上卿才大名不朽早求至尊暮求友豁達常推
海內賢殷勤但酌樽中酒飲醉欲言歸剡溪門前駟馬
光照衣路傍觀者徒唧唧我公不以為是非

贈別晉三處士

有人家住清河源渡河問我遊梁園手持道經注已畢
心知內篇口不言盧門十年見秋草此心惆悵誰能道
知己從來不易知慕君為人與君好別時九月桑葉疎

出門千里無行車愛君且欲君先達今上求賢早上書

賦得還山吟送沈四山人

還山吟天高日暮寒山深送君還山識君心人生老大
須恣意看君解作一生事山間偃仰無不至石泉淙淙
若風雨桂花松子常滿地賣藥囊中應有錢還山服藥
又長年白雲勸盡杯中物明月相隨何處眠眠時憶問
醒時事夢魂可以相周旋

送蔡山人

東山布衣明古今自言獨未逢知音識者閱見一生事
到處豁然千里心看書學劍長辛苦近日方思謁明主
斗酒相留醉復醒悲歌數年淚如雨丈夫遭遇不可知
買臣主父皆如斯我今蹭蹬無所似看爾崩騰何可為
人日寄杜二拾遺

人日題詩寄草堂遙憐故人思故鄉柳條弄色不忍見
梅花滿枝空斷腸身在南蕃無所預心懷百憂復千慮
今年人日空相憶明年人日知何處一卧東山三十春

豈知書劍老風塵
龍鐘還忝二千石
愧爾東西南北人

寄宿田家

田家老翁住東陂
說道平生隱在茲
髮白未曾記日月
山青每到識春時
門前種柳深成巷
墅谷流泉添入池
牛壯日耕十畝地
人閒常掃一茆茨
客來滿酌清樽酒
感興平吟才子詩
巖際窟中藏鼯鼠
潭邊竹裏隱鸕鷀
村墟日落行人少
醉後無心怯路岐
今夜只應還寄宿

明朝拂曙與君辭

封丘縣

我本漁樵孟諸野一生自是悠悠者乍可狂歌草澤中
寧堪作吏風塵下祇言小邑無所為公門百事皆有期
拜迎官長心欲碎鞭撻黎庶令人悲悲來向家問妻子
舉家盡笑今如此生事應須南畝田世情付與東流水
夢想舊山安在哉為銜君命日遲迴乃知梅福徒為爾
轉憶陶潛歸去來

別韋叅軍

二十解書劍西遊長安城舉頭望君門屈指取公卿國
風冲融邁三五朝廷禮樂彌寰宇白璧皆言賜近臣布
衣不得干明主歸來洛陽無負郭東過梁宋非吾土兔
苑為農歲不登雁池垂釣心長苦世人向我同衆人唯
君於我最相親且喜百年見交態未嘗一日辭家貧彈
棋擊筑白日晚縱酒高歌楊柳春歡娛未盡分散去使
我惆悵驚心神丈夫不作兒女別臨岐涕淚沾衣巾

送琿將軍出塞

將軍族貴兵且強漢家已是渾邪王子孫相承在朝野
至今部曲燕支下控弦盡用陰山兒登陣長騎大宛馬
銀鞍玉勒繡螭弧每逐嫖姚破骨都李廣從來先將士
衛青未肯學孫吳傳有沙場千萬騎昨日邊庭羽書至
城頭畫角三四聲匣裏寶刀晝夜鳴意氣能甘萬里去
辛勤動作一年行黃雲白草無前後朝建旌旗夕刁斗
塞下應多俠少年關西不見春楊柳從軍借問所從誰
擊劍酣歌當此時遠別無輕繞朝策平戎早寄仲宣詩

岑參

蜀葵花歌

昨日一花開今日一花開
今日花正好昨日花已老人
生不得恒少年莫惜牀頭沽酒錢
請君有錢向酒家君
不見蜀葵花

登古鄴城

下馬登鄴城城空復何見
東風吹野火暮入飛雲殿
城隅南對望陵臺漳水東流不復回
武帝宮中人去盡年

年春色為誰來

贈酒泉韓太守

太守有能政遙聞如古人
俸錢盡供客家計常清貧酒
泉西望玉關道千年萬磧皆白草
辭君走馬歸長安憶君倏忽令人老

韋員外家花樹歌

今年花似去年好去年人到今年老
始知人老不如花可惜落花君莫掃
君家兄弟不可當列卿御史尚書郎

朝回花底恒會客
花撲玉缸春酒香

題匡城周少府廳壁

婦姑城南風雨秋
婦姑城中人獨愁
愁雲遮却望鄉處
數日不上西南樓
故人薄暮公事閒
玉壺美酒琥珀盤
潁陽秋草今黃盡
醉卧君家猶未還

偃師東與韓尊同訪景雲暉上人即事

山陰老僧解楞伽
潁陽歸客遠相過
煙深草濕昨夜雨
雨後秋風度漕河
空山終日塵事少
平郊遠見行人小

尚書磧上黃昏鐘別駕渡頭一歸鳥

邯鄲客舍歌

客從長安來驅馬邯鄲道傷心叢臺下一旦生蔓草客
舍門臨漳水邊垂楊下繫釣魚船邯鄲女兒夜沽酒對
客挑燈誇數錢酩酊醉時日正午一曲狂歌壚上眠

漁父

扁舟滄浪叟心與滄浪清不自道鄉里無人知姓名朝
從灘上飯暮向蘆中宿歌竟還復歌手持一竿竹竿頭

釣絲長丈餘鼓棹乘流無定居世人那得識深意此翁
取適非取魚

送宇文南金放後歸太原寓居因呈大原郝主
簿

歸去不得意北京關路賒却投晉山老愁見汾陰花翻
作灞陵客憐君丞相家夜眠旅舍雨曉醉春城鴉送君
繫馬青門口胡姬壚頭勸君酒為問太原賢主人春來
更有新詩否

喜韓尊相過

三月灞陵春已老故人相逢耐醉倒
甕頭春酒黃花脂
祿米只充酤酒資
長安城中足年少
獨共韓侯開口笑
桃花點地紅斑斑
有酒留君且莫還
與君兄弟日攜手
世上虛名好是閒

梁州館中與諸判官夜集

彎彎月出挂城頭
城頭月出照梁州
梁州七里十萬家
胡人半解彈琵琶
琵琶一曲腸堪斷
風蕭蕭兮夜漫漫

河西幕中多故人，故人別來三五春。
花門剺前見秋草，豈能貧賤相看老。
一生大笑能幾回，斗酒相逢須醉倒。

臨河客舍呈狄明府兄留題縣南樓

黎陽城南雪正飛，黎陽渡頭人未歸。
河邊酒家堪寄宿，主人小女能縫衣。
故人高卧黎陽縣，一別三年不相見。
邑中雨雪偏着時，隔河東郡人遙羨。
鄴都唯見古時丘，漳水還如舊日流。
城上望鄉應不見，朝來好是懶登樓。

燉煌太守後亭歌

燉煌太守才且賢，郡中無事高枕眠。
太守到來山出泉，黃沙磧裏人種田。
燉煌耆舊鬢皤然，願留太守更五年。
城頭月出星滿天，曲房置酒張錦筵。
美人紅粧色正鮮，側垂高髻挿金鈿。
醉坐藏鉤紅燭前，不知鉤在若箇邊。
為君手把珊瑚鞭，射得半段黃金錢。
此中樂事亦已偏。

秦箏歌送外甥蕭正歸京

汝不聞秦箏聲最苦，五色纏絃十三柱。
怨調慢聲如欲語，一曲未終日移午。
紅亭水木不知暑，忽彈黃鐘和白

紆清風颯來雲不去聞之酒醒淚如雨汝歸秦兮彈秦
聲秦聲悲兮聊送汝

胡笳歌送顏真卿使赴河隴

君不聞胡笳聲最悲紫髯綠眼胡人吹吹之一曲猶未
了愁殺樓蘭征戍兒涼秋八月蕭關道北風吹斷天山
草崑崙山南月欲斜胡人向月吹胡笳胡笳怨兮將送
君秦山遙望隴山雲邊城夜夜多愁夢向月胡笳誰喜

聞

西亭子送李司馬

高高亭子郡城西直上千尺與雲齊盤崖綠壁試攀躋
羣山向下飛鳥低使君五馬天半嘶絲繩玉壺為君提
坐來一望無端倪紅花綠柳鶯亂啼千家萬井連回谿
酒行未醉聞暮雞點筆操紙為君題為君題惜鮮攜草
萋萋沒馬蹄

函谷關歌送劉評事使關西

君不見函谷關崩城毀壁至今在樹根草蔓遮古道空

谷千年長不改寂寞無人空舊山聖朝無事不須闕白
馬公孫何處去青牛老人更不還蒼苔白骨空滿地月
與古時長相似野花不省見行人山鳥何曾識闕吏故
人方乘使者車吾知郭丹却不如請君時憶闕外客行
到闕西多致書

天山雪歌送蕭治歸京

天山雪雲常不開千峰萬嶺雪崔嵬北風夜卷赤亭口
一夜天山雪更厚能兼漢月照銀山復逐胡風過鐵闕

交河城邊鳥飛絕輪臺路上馬蹄滑
晝寒氛萬里凝
闌干陰崖千丈冰
將軍狐裘卧不煖
都護寶刀凍欲斷
正是天山雪下時
送君走馬歸京師
雪中何以贈君別
唯有青青松樹枝

走馬川行奉送封大夫出師西征

君不見走馬川行雪海邊
平沙莽莽黃入天
輪臺九月風夜吼
一川碎石大如斗
隨風滿地石亂走
匈奴草黃馬正肥
金山西見煙塵飛
漢家大將西出師
將軍金甲

夜不脫半夜軍行戈相撥風頭如刀面如割馬毛帶雪
汗氣蒸五花連錢旋作冰幕中草檄硯水凝虜騎聞之
應膽懾料知短兵不敢接軍師西門佇獻捷

輪臺歌奉送封大夫出師西征

輪臺城頭夜吹角輪臺城北旄頭落羽書昨夜過渠黎
單于已在金山西戍樓西望煙塵黑漢兵屯在輪臺北
上將擁旄西出征平明吹笛大軍行四邊伐鼓雪海湧
三軍大呼陰山動虜塞兵氣連雲屯戰場白骨纏草根

劍河風急雲片濶沙口石凍馬蹄脫
亞相勤王甘苦辛
誓將報主靜邊塵古來青史誰不見
今見功名勝古人

白雲歌送武判官歸

北風卷地白草折胡天八月即飛雪
忽如一夜春風來
千樹萬樹梨花開散入珠簾濕羅幕
狐裘不煖錦衾薄
將軍角弓不得控都護鐵衣難冷著
瀚海闌干百丈冰
愁雲慘淡萬里凝中軍置酒飲歸客
胡琴琵琶與羌笛
紛紛暮雪下轅門風掣紅旗凍不翻
輪臺東門送君去

去時雪滿天山路山迴路轉不見君雪上空留馬行處

青門歌送東臺張判官

青門金鎖平旦開城頭日出使車回青門柳枝正堪折
路傍一日幾人別東出青門路不窮驛樓宮樹灞陵東
花撲征衣看似繡雲隨去馬色疑驄胡姬酒壚日未午
絲繩玉釭酒如乳灞頭落花沒馬蹄昨夜微雨花成泥
黃鸝翅濕飛屢低關東尺書醉懶題須臾望君不可見
揚鞭飛鞚疾如箭借問使乎何時來莫作東飛伯勞西

飛燕

梁園歌送河南王說判官

君不見梁孝王脩竹園頽牆隱麟勢仍存嬌娥曼臉成
草蔓羅帷珠簾空竹根大梁一旦人代改秋月春風不
相待池中幾度雁新來洲上千年鶴應在

梁園中有
鶴池雁洲

梁

園二月梨花飛却似梁王雪下時當時置酒延枚叟
肯料平臺狐兔走萬事翻覆如浮雲昔人空在今人口
單父古來稱宓生祇今為政有吾兄

家兄時
宰單父

輜軒若過

梁園道應傍琴臺聞政聲

太白胡僧歌

并序

太白中峰絕頂有胡僧不知幾百歲眉長數寸身
不製繒帛衣以草葉恒持楞伽經雲壁迥絕人迹
罕到嘗東峰有鬪虎弱者將死僧杖而解之西湫
有毒龍久而為患僧器而貯之商山趙叟前年採
茯苓深入太白偶值此僧訪我而說余嘗有獨往
之意聞而悅之乃為歌曰

聞有胡僧在太白蘭若去天三百尺一持楞伽入中峰
世人難見但聞鐘牕邊錫杖解兩虎床下鉢孟藏一龍
草衣不針復不線兩耳垂肩眉覆面此僧年幾那得知
手種青松今十圍心將流水同清淨身與浮雲無是非
商山老人已曾識願一見之何由得山中有僧人不識
城裏看山空黛色

范公叢竹歌

并序

職方郎中兼侍御史范公廼於陝西使院內種竹

新製叢竹歌以見示美范公之清致雅操遂為歌以和之

世人見竹不解愛知君種竹庭府內此君託根幸得地
種來幾時聞已大盛夏脩脩叢色寒閉宵撼撼葉聲乾
能清案牘簾下見宜對琴書牕外看為君成陰將蔽日
迸笋穿階踏還出守節偏凌御史霜虛心願比郎官筆
君莫愛南山松樹枝竹色四時也不移寒天草木黃落
盡猶自青青君始知

裴將軍宅蘆管歌

遼東九月蘆葉斷
遼東小兒採蘆管
可憐管新清且悲
一曲風飄海頭滿
海樹蕭索天雨霜
管聲寥亮月蒼蒼
白狼河北堪愁恨
玄兔城南皆斷腸
遼東將軍長安宅
美人蘆管會佳客
弄調蕭颼勝洞簫
發聲窈窕欺橫笛
夜半高堂客未回
祇將蘆管送君盃
巧能陌上驚楊柳
復向園中誤落梅
諸客愛之聽未足
高卷珠簾列紅燭
將軍醉舞不肯休
更使美人吹一曲

衛節度赤驃馬歌

君家赤驃畫不得一團旋風桃花色紅纓紫韁珊瑚鞭
玉鞍錦韉黃金勒請君韝出看君騎尾長窄地如紅絲
自矜諸馬皆不及却憶百金初買時香街紫陌鳳城內
滿城見者誰不愛揚鞭驟急白汗流弄影行驕碧蹄碎
紫髯胡雛金剪刀平明剪出三驥高握上看時獨意氣
衆中牽出偏雄豪騎將獵向南山口城南狐兔不復有
草頭一點疾如飛却使蒼鷹翻向後憶昨看君朝未央

鳴珂擁蓋滿路香始知邊將真富貴可憐人馬相輝光
男兒稱意得如此駿馬長鳴北風起待君東去掃胡塵
為君一日行千里

送魏升卿擢第歸東都因懷魏校書陸渾喬潭
井上梧桐雨灞亭卷秋風故人適戰勝匹馬歸山東問
君今年三十幾能使香名滿人耳君不見三峰直上五
千仞見君文章亦如此如君兄弟天下稀雄詞健筆皆
若飛將軍金印鞶紫綬御史鐵冠重繡衣高生作尉別

來久因君為問平安否魏侯校理復何如前日人來不
得書陸渾山水佳可賞蓬閣閒時日應往自料青雲未
有期誰知白髮偏能長壚頭青絲白玉瓶別時相顧酒
如傾搖鞭舉袂忽不見千樹萬樹空蟬鳴

送費子歸武昌

漢陽歸客悲秋草旅舍葉飛愁不掃秋來倍憶武昌魚
夢着祇在巴陵道曾隨上將過祁連離家十年常在邊
劍鋒可惜虛用盡馬蹄無事今已穿知君開館恒愛客

樗蒲百金每一擲平生有錢將與人江上故園空四壁
吾觀費子毛骨竒廣眉大口仍赤髭看君失路尚如此
人生貴賤那得知高秋八月歸南楚東門一壺聊出祖
路指鳳凰山北雲衣霑鸚鵡洲邊雨勿歎蹉跎白髮新
應須守道勿羞貧男兒何心戀妻子莫向江村老却人
與獨孤漸道別長句兼呈嚴八侍御

輪臺客舍春草滿潁陽歸客腸堪斷窮荒絕漠鳥不飛
萬磧千山夢猶懶憐君白馬一書生讀書千卷未成名

五貴侯門脚不到數畝山田身自耕興來浪迹無遠近
及至辭家憶鄉信無事垂鞭信馬頭西南幾欲窮天盡
奉使三年獨未歸邊頭詞客舊來稀借問君來得幾日
到家不覺換春衣高齋清晝卷羅幕紗帽接羅幃不著
中酒朝眠日色高彈棋夜半燈花落冰片高堆金錯盤
滿堂凜凜五月寒桂林蒲桃新吐蔓武城刺蜜未可餐
軍中置酒夜撾鼓錦筵紅燭月未午花門將軍善胡歌
葉河蕃王能漢語知爾園林壓渭濱夫人堂上泣羅裙

魚龍川北磐谿雨鳥鼠山西洮水雲臺中嚴公於我厚
別後新詩滿人口自憐棄置天西頭因君為問相思否



唐詩品彙卷二十九

欽定四庫全書

集部

唐詩品彙卷

三十五
三十四

詳校官檢討臣德生

助教臣常循覆勘

總校官進士臣朱鈐

校對官編修臣勵守謙

謄錄監生臣薛夢陽

欽定四庫全書

唐詩品彙卷三十

明 高棟 編

七言古詩六

名家 下

李頎

古意

男兒事長征，少小幽燕客。
賭勝馬蹄下，由來輕七尺。
殺

人莫敢前鬚如蝟毛磔黃雲隴底白雪飛未得報恩不
能歸遼東小婦年十五慣彈琵琶解歌舞今為羌笛出
塞聲使我三軍淚如雨

鮫人歌

鮫人潛織水底居側身上下隨遊魚輕綃大綵不可織
夜夜澄波連月色有時寄宿來城市海島青冥無極已
泣珠報恩君莫辭今年相見明年期始知萬族無不有
百尺深泉架戶牖鳥沒空山誰復望一望雲濤堪白首

古從軍行

白首登山望烽火黃昏飲馬傍交河行人刁斗風沙暗
公主琵琶幽怨多野雲萬里無城郭雨雪紛紛連大漠
胡鴈哀鳴夜夜飛胡兒眼淚雙雙落聞道王門猶被遮
應將性命逐輕車年年戰骨埋荒外空見蒲桃入漢家

古行路難

漢家名臣楊德祖四代五公享茅土父子兄弟綰銀黃
躍馬鳴珂朝建章火浣單衣繡方領茱萸錦帶玉盤囊

賓客填街復滿座片言出口生輝光世人逐勢爭奔走
漚膽墮肝惟恐後當時一願登青雲自謂生死長隨君
一朝謝病還鄉里窮巷蒼苔絕知己秋風落葉閉重門
昨日論交竟誰是薄俗嗟嗟難重陳深山麋鹿可為鄰
魯連所以蹈東海古往今來稱達人

緩歌行

小來託身攀貴游傾財破產無所憂莫擬經過石渠署
朝將出入銅龍樓結交杜陵輕薄子謂言可生復可死

一沈一浮會有時棄我翻然如脫屣男兒立身須自強
十年閉戶潁水陽業就功成見明主擊鐘鼎食坐華堂
二八蛾眉梳墮馬美酒清歌曲房下文昌宮中賜錦衣
長安陌上退朝歸五陵賓從莫敢視三省官僚揖者稀
早知今日讀書是悔作從來狂俠非

王母歌

武皇齋戒承華殿端拱須臾王母見霓旌照耀麒麟車
羽蓋淋漓孔雀扇手指玄梨遣帝食可以長生臨西縣

頭上復戴九星冠總領玉童坐南面欲聞要言今告汝
帝乃焚香請此語若能鍊魄去三尸後當見我天皇所
顧謂侍女董雙成酒闌可奏雲和笙紅霞白日儼不動
七龍五鳳紛相迎惜哉志驕神不悅歎息馬蹄與車轍
複道歌鐘香將暮深宮桃李飛成雪為看青玉五枝燈
蟠螭吐火光已絕

送劉昱

八月寒葦花秋江浪頭白北風吹五兩誰是潯陽客鸕

鷓鴣山頭宿雨晴揚州郭裏暮潮生
行人夜宿金陵渚試聽沙邊有鴈聲

送從弟遊江淮兼謁鄱陽劉太守

都門柳色朝朝新念爾今為江上人
穆陵關帶清風遠彭蠡湖邊芳草春
泊舟借問西林寺曉聽猿聲在山翠
潯陽北望鴻鴈回湓水東流客心醉
須知聖代舉賢良不使遺才滯一方
應見鄱陽虎符守思歸共指白雲鄉

夏宴張兵曹東堂

重林華屋堪避暑況乃烹鮮會佳客主人三十朝大夫
滿座森然見矛戟北牕卧簟蓮心花竹裏蟬鳴西日斜
羽扇搖風却珠汗玉盆貯水割甘瓜雲峰峨峨自冰雪
坐對芳尊不知熱醉來但挂葛巾眠莫道明朝有離別
崔五六圖屏風各賦一物得烏孫佩刀

烏孫腰間佩兩刀刃可吹毛錦為帶握中枕宿穹廬室
馬上割飛翳螭塞執之魑魍誰能前氣凜清風沙漠邊
磨用陰山一片玉洗將朔地獨流泉主人屏風寫奇狀

鐵鞘金環儼相向
回頭瞪目時
一看使予心在江湖上

愛敬寺古藤歌

古藤池水盤樹根
左攫右拏龍虎蹲
橫空直上相陵突
丰茸離纚若無骨
風雷霹靂連黑枝
人言其下藏妖魑
空庭落葉乍開合
十月苦寒常倒垂
憶昨花飛滿空殿
密葉吹香飯僧遍
南階雙桐一百尺
相與年年老霜霰

欲之新鄉答崔顥
蔡母潛

數年作吏家屢空
誰道黑頭成老翁
男兒在世無產業

行子出門如轉蓬
吾屬交歡此何夕
南家擣衣動歸客
銅鑪將炙相歡飲
星宿縱橫露華白
寒風卷葉度溱沔
飛雪布地悲峨峨
孤城日落見棲鳥
馬上時聞漁者歌
明朝東路把君手
臘日辭君期歲首
自知寂寞無去思
敢望縣人致牛酒

送康洽入京進樂府歌

識子十年何不遇
只愛歡遊兩京路
朝吟左氏嬌女篇
夜誦相如美人賦
長安春物舊相宜
小苑蒲萄花滿枝

柳色偏濃九華殿鶯聲醉殺五陵兒曳裾此夜從何所
中貴由来盡相許白袂春衫仙吏贈烏皮隱几臺郎與
新詩樂府唱堪愁御妓應傳鵲樓西上雖因長公主
終須一見曲陵侯

送劉十

三十不官亦不娶時人焉識道高下房中惟有老氏經
樞上空餘少遊馬往來嵩華與函秦故歌一曲前山春
西林獨鶴引閒步南澗飛泉清角巾前年上書不得意

歸卧東山兀然醉諸兄相繼掌青史第五之名齊騁騎
烹葵摘果告我行落日夏雲縱復橫聞道謝安掩口笑
知君不免為蒼生

送陳章甫

四月南風大麥黃棗花未落桐葉長青山朝別暮還見
嘶馬出門思舊鄉陳侯立身何坦蕩虬鬚虎眉仍大顙
腹中貯書一萬卷不肯低頭在草莽東門酤酒飲我曹
心輕萬事如鴻毛醉卧不知白日暮有時空望孤雲高

長河浪頭連天黑津吏停舟渡不得鄭國遊人未及家
洛陽行子空歎息聞道故林相識多罷官昨日今何如

放歌行答從弟異鄉

小來好文恥學武世上功名不解取雖沾寸祿已後時
徒欲出身事明主栢梁賦詩不及宴長楸走馬誰相數
斂迹俛眉心自甘高歌擊節聲半苦由是蹉跎一老夫
養雞牧豕東城隅空歌漢代蕭相國肯事霍家馮子都
徒爾當年聲籍籍濫作詞林兩京客故人斗酒安陵橋

黃鳥春風洛陽陌吾家令弟才不羈五言破的人共推
興來逸起如濤湧千里長江歸海時別離短景何蕭索
佳句相思能間作舉頭遙望魯陽山木葉紛紛向人落

別梁鎰

梁生個儻心不羈途窮氣蓋長安兒回頭轉眄侶鵬鷃
有志飛鳴人豈知誰云四十無祿位曾與大軍掌書記
抗辭請勿誅部曲作色論兵犯二帥一言不合龍頷侯
擊劍拂衣從此棄朝朝飲酒黃公壚脫帽露頂爭叫呼

庭中擯鼻昔常掛懷裏琅玕今在無時人見子多落魄
共笑狂歌非遠圖忽然遣躍紫騮馬還是昂藏一丈夫洛
陽城頭曉霜白層冰峨峨滿川澤但聞行路吟新詩不
數舉家無儋石莫言貧賤長可欺覆篋成山當有時莫
言富貴長可託木槿朝看暮還落不見古時塞上翁倚
伏由來任天作去去滄波勿復陳五湖三江愁殺人

聽董大彈胡笳兼寄語弄房給事

按唐史董庭蘭善鼓琴為

房琯門客天寶五載琯攝給事中此詩疑贈庭蘭而兼寄次律之作也

蔡女昔造胡笳聲一彈一十有八拍胡人落淚沾邊草
漢使斷腸對歸客古戍蒼蒼烽火寒大荒陰沈飛雪白
先拂商絃後角羽四郊秋葉驚撼撼董夫子通神明深
松竊聽來妖精言遲更速皆應手將往復旋如有情空
山百鳥散還合萬里浮雲陰且晴嘶酸雛鴈失羣夜斷
絕胡兒戀母聲川為淨其波鳥亦罷其鳴烏珠部落家
鄉遠邈娑沙塵哀怨生幽音變調忽飄灑長風吹林雨
墮瓦迸泉颯颯飛木末野鹿呦呦走堂下

殷云足可歎
獻震蕩心神

長安城連東掖垣鳳凰池對青瑣門高才脫畧名與利
日夕望君抱琴至

王維

魚山神女祠歌

離騷作魚山迎
送神曲二首

坎坎擊鼓魚山之下吹洞簫望極浦女巫進紛屢舞陳
瑶席湛清醑風淒淒兮夜雨神之來兮不來使我心兮

苦復苦

右迎
神曲

紛進拜客堂前目眷眷兮瓊筵來不語兮意不傳作暮

雨兮愁空山悲急管兮繁絃靈之駕兮儼欲旋脩雲收

兮雨歇山青青兮水潺湲

右送神曲

送友人歸山歌二首

離騷作
山中人

山寂寂兮無人又蒼蒼兮多木羣龍兮滿朝君何為兮
空谷丈寡和兮思深道難知兮行獸悅石上兮流泉與
松間兮草屋入雲中兮養雞上山頭兮抱犢神與棗兮
如爪虎賣杏兮收穀愧不才兮妨賢嫌既老兮貪祿誓
解印兮相從何詹尹兮可卜

劉云不用楚調自適目前
詞少而意多尚覺盤谷歌

凡意為

山中人兮欲歸雲冥冥兮雨霏霏水驚波兮翠管靡白
鷺忽兮翻飛君不可兮褰衣山萬重兮一雲混天地兮
不分樹曖曖兮氛氲損不見兮空聞忽山西兮夕陽見
東臯兮遠村平蕪綠兮千里眇惆悵兮思君

宋玉之下
淵明之上

甚似晉人不知者以為氣短
知者以為琴操之餘音也

登樓歌

聊上君兮高樓飛薨鱗次兮在下俯十二兮通衢綠槐

參差兮車馬却瞻兮龍首前眺兮宜春王畿鬱兮千里
山河壯兮咸秦舍人下兮青宮據胡牀兮書空執戟疲
兮於下位老夫好隱兮牆東亦幸有張伯英草聖兮龍
騰虬躍擺長雲兮捩回風琥珀酒兮雕胡飯君不御兮
日將晚秋風兮吹衣夕鳥兮爭返跡砧發兮東城林薄
暮兮蟬聲遠時不可兮再得君何為兮偃蹇

隴頭吟

長城少年遊俠客
夜上戍樓看太白
隴頭明月尚臨關

隴上行人夜吹笛關西老將不勝愁駐馬聽之雙淚流
曾經大小百餘戰麾下偏裨萬戶侯蘇武纔為典屬國
節旄空落海西頭

劉云次第轉折恨惋
何限又非長篇所及

夷門歌

七國雄雌猶未分攻城殺將何紛紛秦兵益圍邯鄲急
魏王不救平原君公子為嬴停駟馬執轡逾恭意逾下
亥為屠肆鼓刀人嬴乃夷門抱關者非但慷慨獻奇謀
意氣兼將身命酬向風刎頭送公子七十老翁何所求

洛陽女兒行

時年

洛陽女兒對門居，纔可顏容十五餘。
良人玉勒乘驄馬，侍女金盤膾鯉魚。
畫角朱樓盡相望，紅桃綠柳垂簷向。
羅帷送上七香車，寶扇迎歸九華帳。
狂夫富貴在青春，意氣驕奢劇李倫。
自憐碧玉親教舞，不惜珊瑚持與人。
春牕曙滅九微火，九微片片飛花璫。
戲罷曾無理曲時，粧成祇是薰香坐。
城中相識盡繁華，日夜經過趙李家。
將憐越女顏如玉，貧賤江頭自浣紗。

燕支行

漢家大將才且雄
來時謁帝明光宮
萬乘親推雙闕下
千官出餞五陵東
誓辭甲第金門裏
身作長城玉塞中
衛霍纔堪一騎將
朝廷不數貳師功
趙魏燕韓多勁卒
關西俠少何咆嘯
報讐只是聞嘗膽
飲酒不曾妨刮骨
畫戟雕戈白日寒
連旗大旆黃塵沒
疊鼓遙翻瀚海波
鳴笳亂動天山月
麒麟錦帶佩吳鉤
颯踏青驪躍紫騮
拔劍已斷天驕臂
歸鞍共飲月支頭
漢兵大呼一當百

虜騎相看哭且愁教戰須令赴湯火終知上將先伐謀

老將行

少年十五二十時步行奪取胡馬騎射殺山中白額虎
肯數鄴下黃鬚兒一身轉戰三千里一劍曾當百萬師
漢兵奮迅如霹靂虜騎崩騰畏蒺藜衛青不敗由天幸
李廣無功緣數奇自從棄置便衰朽世事蹉跎成白首
昔時飛箭無全目今日垂柳生左肘路傍時賣故侯瓜
門前學種先生柳蒼茫古木連窮巷寥落寒山對虛牖

劉云愈
出愈奇
誓令疎勒出飛泉不似潁川空使酒賀蘭山下

陣如雲羽檄交馳日夕聞節使三河募年少詔書五道

出將軍試拂鐵衣如雲色聊持寶劍動星文願得燕弓

射天將恥令越甲鳴吾君莫嫌舊日雲中守獨堪一戰

立功勲

劉云滿篇風致收拾處常嫩而短使人情事欲絕又云起結驕嫩復勝老諸

桃源行

漁舟逐水愛山春兩岸桃花夾去津坐看紅樹不知遠
行盡清谿不見人山口潛行始隈隩山開曠望旋平陸

遙看一處攢雲樹近入千家散花竹樵客初傳漢姓名
居人未改秦衣服居人共住武陵源還從物外起田園
月明松下房櫳靜日出雲中雞犬喧驚聞俗客爭來集
競引還家問都邑平明閭巷掃花開薄暮漁樵乘水入
初因避地去人間更聞成仙遂不還峽裏誰知有人事
世中遙望空雲山不疑靈境難聞見塵心未盡思鄉縣
出洞無論隔山水辭家終擬長遊行自謂經過舊不迷
安知峰壑今來變當時只記入山深青谿幾度到雲林

春來遍是桃花水不辨仙源何處尋

望終南贈徐中書

晚下兮紫薇悵塵事兮多違駐馬兮雙樹望青山兮不歸

答張五弟

終南有茅屋前對終南山終年無客長閉關終日無心
長自閒不妨飲酒復垂釣君但能來相往還

寄崇梵僧

崇梵僧崇梵僧秋歸覆金春不還落花啼鳥紛紛亂閉
戶山牕寂寂閒峽裏誰知有人事郡中遙望空雲山

寒食城東即事

清谿一道穿桃李演漾綠蒲涵白芷谿上人家凡幾家
落花半落東流水蹴踘屢過飛鳥上鞦韆競出垂楊裏
少年分日作遨遊不用清明燕上已

劉云自是活動

同崔傳答賢弟

洛陽才子姑蘇客桂苑殊非故鄉陌九江楓樹幾回青

一片揚州五湖白揚州時有下江兵蘭陵鎮前吹笛聲
夜火人歸富春郭秋風鶴唳石頭城周郎陸弟為儔侶
對舞前谿歌白紵曲几書留小史家草堂碁賭山陰墅
衣冠若話外臺臣先數夫君席上珍更聞臺閣求三語
遙想風流第一人

送李睢陽

將置酒思悲翁使君去出城東麥漸漸雉子斑槐陰陰
到潼關騎連連車遲遲心中悲宋又遠周間之南淮夷

東齊兒碎碎織練與素絲遊人賈客信難持五穀前熟
方可為下車閉閣君當思天子當殿儼衣裳大官尚食
陳羽觴彤庭散綬垂明璫黃紙詔書出東廂輕紈疊綺
爛生光宗室子弟君最賢分憂當為百辟先布衣一言
相為死何況聖主恩如天鸞聲噦噦魯侯旗明年上計
朝京師須憶今日斗酒別慎勿富貴忘我為

崔顥

七夕詞

長安城中月如練家家此夜持針線
仙裙玉佩空自知
天上人間不相見
長信深陰夜轉幽
玉階金閣數螢流
班姬此夕愁無限
河漢三更看斗牛

鴈門胡人歌

高山代郡東接燕
鴈門胡人家近邊
解放胡鷹逐塞鳥
能騎代馬獵秋田
山頭野火寒多燒
雨裏孤峰濕作烟
聞道遼西無鬪戰
時時醉向酒家眠

長安道

河岳英靈作
霍將軍篇

長安甲第高入雲誰家居住霍將軍日晚朝回擁賓從
路傍拜揖何紛紛莫言炙手手可熱須臾火盡灰亦滅莫
言貧賤即可欺人生富貴自有時一朝天子賜顏色世
事悠悠應始知

孟門行

黃雀銜黃花翩翩傍簷隙本擬報君恩如何反彈射金
壘美酒滿座春平原愛才多衆賓滿堂盡是忠義士何
意得有讒諛人諛言反復那可道能令君心不自保北

園新栽桃李枝根株未固何轉移成陰結實君自取若
問傍人那得知

代閨人答輕薄少年

妾家近隔鳳凰池粉壁紗牕楊柳垂本期漢代金吾壻
誤嫁長安遊俠兒兒家夫壻多輕薄借客探丸重然諾
平明挾彈入新豐日晚揮鞭出長樂青絲白馬冶遊園
能使行人駐馬看自矜陌上繁華盛不念閨中花鳥闌
花間陌上春將晚走馬鬬雞猶未返三時出望無消息

卷三十
一去那知行近遠
桃李花開覆井欄
朱樓落日捲簾看
愁來欲奏相思曲
抱得秦箏不忍彈

行路難

君不見建章宮裏金明枝
萬萬長條拂地垂
二月三月花如霰
九重深幽君不見
艷彩朝含四寶宮
香風吹入朝雲殿
漢家宮女春未闌
愛此芳春朝暮看
來看去心不忘
攀折將安鏡臺上
雙雙素手剪不成
兩兩紅粧笑相向
建章昨夜起春風
一花飛入長信宮
長信麗人

見花泣憶此珍樹何嗟及我昔初在昭陽時朝攀暮折
登玉墀只言歲歲長相對不悟今朝遙相思

渭城少年行

洛陽二月梨花飛秦地行人初憶歸揚鞭走馬城南陌
朝逢驛使秦川客驛使前日發章臺傳道長安春早來
棠梨宮中燕初至蒲萄館裏花正開念此使人歸更早
三月便達長安道長安道上春可憐搖風蕩日曲江邊
萬戶樓臺臨渭水五陵花柳滿秦川秦川寒食盛繁華

遊客春來不到家，
鬪雞下社塵初合。
走馬章臺日未斜，
章臺帝城稱貴里。
青樓日晚歌鐘起，
貴里豪家白馬驕。
五陵年少不相饒，
雙雙挾彈來金市。
兩兩鳴鞭上渭橋，
渭城壚頭酒新熟。
金鞍白馬誰家宿，
可憐錦瑟爭琵琶。
玉壺清酒就君家，
小婦春來不解羞。
嬌歌一曲楊柳花，
劉云崔顥落第歌
自得刻削乃不能及

江邊老人愁

江南少年十八九，
乘舟欲渡清谿口。
忽逢江邊一老翁，

鬚眉皓白已衰朽自言家代仕梁陳垂紫拖金三十人
兩朝出將復入相五世疊鼓乘朱輪父兄三葉皆尚主
女子四代為妃嬪南山賜田接御苑北宮甲第連紫宸
直言榮華未休歇不覺山崩海將竭兵戈亂入建康城
烟火連燒未央闕衣冠女子陷鋒刃良將名臣盡埋沒
山川改易失朝市衢路縱橫填白骨老人此時尚少年
脫身走得投海邊罷兵歲餘未敢出去家三載方來旋
蓬蒿忘却五城宅草木不識清谿田雖然得歸到鄉土

零丁貧賤長辛苦采樵屢入厯陽山刈稻長過新林浦
少年欲知老人歲豈知今年一百五君今少壯我已衰
我昔少年君不覩人生貴賤各有時莫見羸老相輕欺
感君相問為君說說罷不覺令人悲

唐詩品彙卷三十